

Նիսիիքս ամենայն մասամբ խեղճ է քան զՍալա-
տները անկարգ և աղքատին, զուրկ բուսականու-
թենէ, եկեղեցին թէպէտ նորաչէն և աղիւսա-
կերտ, այլ աղքատին ներսի կողմէն. վարժատան
մէջ 37 բոկոտն աշակերտք, միով բանիւ ամենայն
ինչ տխուր և ճնշիչ ազդեցութիւն ունեցաւ իմ
վրայ: Եթէ շուտով եկեղեցւոյն երեցը Տէր Յովհան-
նէս Տէր-Սիմոնեան համակրելի քահանայն չգար
չհասնէր, անմխիթար և կոտորած սրտով հարկ պի-
տի լինէր ինձ մեկնելու 'ի գիւղէն: Հին նոր՝ ինչ
որ կար եկեղեցւոյն մէջ յետ միանգամ աչքէ ան-
ցընելու, գնացինք Տէր-Հօր անպաճոյճ բնակարա-
նը, որ ոչ հեռի յեկեղեցւոյն՝ բարձրէն գիւղին վրայ
կը հայէր: Տէր Յովհաննէս վաթսնամեայ ոմն է.
թէպէտ ըստ վկայելոյ անձին հիւանդոտ ոմն, որ
արտաքուստ չէր ցուցընել, սակայն և այնպէս զը-
ւարթ և հարտարախօս բնութեան տէր. անշուշտ
չնորհիւ զուարթ բնաւորութեան՝ համբերութեամբ
կը տանէր իւր ոչ նախանձելի վիճակին:

Ծուխը աղքատ, առողջութիւնը կորսնցուցած,
գեղ տեղ, ուր դարման և ճար կը պակասի, և որ
մեծն է՝ զուրկ այն մխիթարութենէն, որով քա-
ջալերուած շատ երեցունք անտանելեաց կը համ-
բերեն, այն է ունկնդրութիւն և հպատակութիւն
հօտին: Տէր Յովհաննէս այս ամէն բանէ զրկուած՝
« Այսօր եթէ մեռնիմ՝ ցաւելու բան չունիմ, աչքս
յօժարութեամբ կը փակեմ » կը զրուցէր: Վշտա-
կից եղայ վշտամբեր Տէր տիրոջ, միանգամայն հե-
տաքրքրութիւնս կը շարժէր լսել իմանալ քանի մի
տեղեկութիւնք, և եթէ յորում մասին էր Տէր-
Հօր աւելի վիշտը. այլ հարցնել ինձ անպատշաճ
կ'երևնար, որ չլինի նոր վշտաց լինիմ պատճառ: